

Téerëe bíní Saak ra Kúnsëe

Filiḅ téerí beh, Saak won a ḅëewë gémú Yéesú, hasлуу filiḅ äldúnë ḅéeḅ rë.

Ḍi wonte affi wa di yii leḅke ḅee na pesuu wa ra, ndaa ḅi yëedíḅté wë yin caak ḅal.

Iña bíní Saak yee ra mín yúun ow fi ow ḅéeḅ. Saak wonte sun fi :

- yii leḅke múñ a ḅañ Koope (1.2-8 ; 5.13-18),
- yii leḅke ñékíḅ a yíkëe alal (1.9-11 ; 5.1-6),
- yii leḅke súfúñ a fíir (1.12-18),
- yii leḅke síkírëh a ñeyi Unni Koope (1.19-27),
- yii leḅke génëntélë' (2.1-13),
- yii leḅke ngémí teeḅuuy pagaḅ (2.14-26),
- yii leḅke ḅúk (3.1-12),
- yii leḅke ñaañ a neḅ nuf (3.13-18),
- yii leḅke iñi äldúnë (4.1-10),
- yii leḅke heefa' (4.11-12),
- yii leḅke gaan-gaanloh (4.13-17),
- a yii leḅke nimili Yíkëe (5.7-11).

Ḃëyí fí jañi téerí bee ḅéeḅ ay ot biti ḅëyí won biti ḅi gémpé Kiristaa waḅtee rii teeḅa' pagaḅḅi.

Wodohi Saak ḅëewí Koope

¹ Ḍon fi talli sabboo a ana ya, ḅon fi ḅëewí Koope ya hasлуу äldúnë ḅéeḅ rë, so' mi Saak súrgí Koope a Yéesú-Kiristaa Yíkëe ma na wodoh ron.

Woni Saak yii leḅke múñ

² Ḍon fi koy-yaayyi yeh, keeññon sosa níi sos biti ḅon ñee coono fi mín ḅíi hen ḅéeḅ, ³ ndah ḅon yúhúté biti

coono fi ñéerë' a ngém daa na kúɗ múñ. ⁴ Te múñí baa homa ɗon na faraah raa, ɗon ay hen ɓëewí lahuy síkkë te nonute, ɗon hen ɓëewí mitute sèk. ⁵ Ndaa nék, yaha bití ow di ɗon na yéeh yii paga ri raa, ɗi ɗaga, Koope ay rii teeɓ yee nay ri page ra. Koope yéwénté, na oneeh ona' i lahay keeñi, ɗi ona' ɓëewë ɓéeɓ. ⁶ ɓëe' ɗaga a ngém rek, ɓanti lah nuf ana, ndée ɓëyí na lah nuf ana mada' a mboowaana kísí fë baa ngilaaw ma na ɓéyíɗ ɗí, na jaay ri hatinna ɓéeɓ rë nen. ⁷ ɓëyí baa ɓanay haba' bití ɗi ay lah yin Yíkëe në, ⁸ ndah ɗi laha' nuf ana. ɗi laɓa' laɓoo rek.

Yii lejke ñëkíɗ a yíkëe alal

⁹ ɓëyí fí hente ñëkíɗ te gémpé Yéésú, damaa ndah Koope ɓéyíɗté rí. ¹⁰ ɓëyí fí hente yíkëe alal, bíyëe ɗal ndah Koope cépíɗté rí, ɗi ay muuy. ɗi ay made ti capussi gaaw fa luufa nen : ¹¹ na'a fetlee rek, gaaw fa tam, capussa yookoh, wuni teem daaha. Ti ɗaaha nen, ɓëe' hen yíkëe alal ra ay muuy ɗeefa ɗi takaña' légéyí.

Yii lejke súfúñ a fíir

¹² Lahte sos-keeñ, ɓëe' nay home coono ɗi múñ ɗí rë ! ɗi ham híin níi ɗi ɗúh në rëe, ɗi ay ɓeku baanii ndami pesa na ɗúméh rë, bee gap Koope ɓëewë fahuu ɗi fi Koope ra.

¹³ ɓëyí paɗ yin ɓos hom nufi ɓanan won bití Koope daa fíir rí, ndah ow mínéh fíir Koope te Koope na fíiréh ow. ¹⁴ Yee na fíir ow ra kay, daa ri bití ɓëe' faha' pes-neɓ níi neba hécé rí. ¹⁵ Te faha' pes-neɓ mada' loo-koy nen te límë' bakaad, te koy ki baa hen gaan raa límë' húl. ¹⁶ Kon ɗon fi koy-yaayyi yeh, ɗon fa faha' mi níi faha' ra, ngënë nëfii affon. ¹⁷ Yii wunte a yii ñeete waal ɓéeɓ kola' sun-Koo. Wa kola' Koope na, ɗi fa sak na'a, céyín fë a hulla ra.

Di na lofiseeh, na laayeh ní ñúusd'é ow. ¹⁸ Di coobarii, d'i ñeya'te Unee ke ri daa kaaf ka ra yen límëetúté, nda yen hen ðëewë këllúu di iña sak ri ra ðéeð ti iña d'éðpí lecu meeyya jébelúté Koope ra nen.

Yii lejke síkírèh a ñeyi Un Koope

¹⁹ Koy-yaayyi yeh, d'on fa faha' mi ní faha' ra, yúhí biti ðëyí nè ðéeð síkírèh wadtee rii yooð. Won mbée neeð nék waray rii yooð ; ²⁰ ndah ðëyí neeð, na pageh yii júbpé fii Koope. ²¹ Kon, hégíi sobe a kaañ paŋ yin ðos, d'on cépíð affon, d'on tah Una soh Koope d'on na ra. Uni baa daa mín d'ën sëmle'. ²² Uni baa nék, ngënë téyí síkírèhí kut ndaa lah ñéyí nè, henay bah, d'on ay nofa' affon. ²³ Bëyí fí síkírèh Una te fu ñeyay na, fu mada' a ðëe' caŋ seetaan baa na olsoh afi ra nen. ²⁴ Olsa' ri afi ní wocce ra, saañce yíppée hal d'ee man d'i ra. ²⁵ Bëyí kúnís nuffi ðéeð síkírèh Kootaa júð na tah ow laha' afi te haleh iña keloh ri ra, pokoh na ñee na raa nék, ðëyí baa ay lah sos-keeñ di yii paŋ d'i ðéeð.

²⁶ Bëyí haba' afi biti d'i ðëyí gémpé te d'eeffa d'i mínéh ham búkí, ðëyí baa nofa'te afi, ngémí lahay njiriñ. ²⁷ Di fíi Baap-Koo, ðëe' gém kah-kah te ngémí lante ra, daa ðëe' nè dímlé' baayu ya a jétíðd'é súfúñ fí wë, te hampe afi yii na sobeyil ow ëldúnë rë.

2

Yii lejke génëntélé'

¹ Koy-yaayyi yeh, d'on fa gémú Yéesú-Kiristaa Yíkëe fë líif a ndam ra, ngënë génëntélíi ðëewë. ² Mín hen d'on lah teya', lah ðëewí ana yi ac teya'i baaha, ðëyí yínëe ðekoh supi úrís a búuðbí wunte, ðëyí yínëe hen ñékið ðekoh síf. ³ Don yed' ðëe' ðekoh búuðbí wanna cér d'on won d'i ac took paa' fíi, d'on won ñëkdë caŋ dín mbée d'on won

di took kotton feey raa, ⁴ deef don génentélúuté hanndal kon. Don oluun ri dfaaha raa, deef baa af neh ! Te don daa i wa níi sah don bíssée bëewë ?

⁵ Kon don fi koy-yaayyi yee faha' mi níi faha' ra, kúnsí nuffon don síkírèh ! Koope tanis bëewë henu ñèkíð òldúnè rè nda wa lah ngémí híinté hen alal mi wa neh a ? Di tanis wa ðal nda wa haal nguur ka gap di bëewë fahuu di fi Koope ra ! ⁶ Ndaa don, don heefuu ñèkíð heefoo. Te añcañ, yíkëe yí alalla daa na moklu ron, daa na tækðú ðèn këem. ⁷ Wa fi yíkëe yí alalli yaa daa na solu tii nebee ke Kiristaa fa don teyu ðii na ra.

⁸ Bíníyúté Téerëe bitih : « Di fahuu ron affon, lah fèhú moroommon dfaaha. »[☆] Don ñee túuyë'ée ké Koope Buur baa raa, deef don pagute yii wunte. ⁹ Don génentélé' rëe nék, deef don bakaarute te Kootaa ay keen sun fon, ndah don ñeyuy na. ¹⁰ Bëyí ñeyay yin yínè kut di túuyë' yí Kootaa, wuti di ñee yee tas ða bééð rëe sah deef di tooñce, daa ri biti di ñeyay wa bééð. ¹¹ Koope daa won tih : « Ngënë mësíi njaaliyoh. »[☆] Daa ri won ðal tih : « Ngënë mësíi bëem ow. »[☆] Kon bëyí bëem ow, wuti ri njaaliyaay raa sah, deef di ñeyay Kootaa. ¹² Don yahti pañ yin mbée don yahti won yin raa, lah hélí nuf biti Koope ay ron aattiyee Kootaa na tah ow laha' afi ra. ¹³ Bëyí nē yérméeh, ii yérmú. Yermaande daa lukki lah solo aattiya'.

Yii lejke ngém

¹⁴ Koy-yaayyi yeh, ow won biti di gémpé te na teebeeh ri pagaðdi raa, ngémí baa lahte njiriñ a ? Ngémí baa ay rii sèmlë' è ? ¹⁵ Mín hen ow di koy-yaayyon filið ngémë ðekaa sif te laheh líif-loo. ¹⁶ Ow di don na won bëyí baa

[☆] 2:8 2.8 Saame Tali Léwí 19.18 [☆] 2:11 2.11 Saame Kolohi koyyi Israyel Ésíp 20.14 [☆] 2:11 2.11 Saame Kolohi koyyi Israyel Ésíp 20.13

bitih : « Toge mbook ! Lah bekee ní fu wun, fu ñam ní lowu may, sos sib ! » Di won bée' unni yaa te yereh ri yee waɗ ɗii na raa, woni baa ɗeef lahte njiriñ a ? ¹⁷ Ti ɗaaha nen, ngémí ay teye ɓúk ii teeɓuu pagadɗ, ngémí baa lahay njiriñ, saatate.

¹⁸ Heeyce ow ay won biti lahte ɓëewí gémú Koope, lahte yí paguu yin wun. Yee nay mii wone ɓëyí baa ra daa ri biti rek tee : ow mínéh teeɓa' biti ɗi gémpe Koope te ɗeef ɗi na pageh yin wun. Iñi wanna nay rii page ra kay daa nay teeɓee biti ɗi gémpe. ¹⁹ Di gémeyi biti Koope yiné kut woo ? Baa yii wunte, ndaa ɗi yúhë biti yébitèh yë ɓal gémúté baaha te títúté nè ní na saaku ! ²⁰ Di yúhë biti ɓal ɗi lahay af ! Caa nék mi won ɗi yee tah ngémí teeɓuuy pagadɗ lahay njiriñ ra, hém ɗi faha' yúh. ²¹ Di fi ɓëyí baa nérsëe bitih : Koope haba' caac Abraham ɓëyí júɓpé bee tahrá' ri ri, ɓeɓpe koohi Isaak na waay jébelí sarah sun fi tígè na hawruu ra neh a ?[☆] ²² Kon, ɓëyí baa otte biti ngémí Abraham a yii wuna paɗ ri, tahiɗte Koope ra daa ñéeré', te yii baa tahte ngémí mitte sèk. ²³ Yee húmú bíníyú Téerëe rë laha'te ɗah. Húmú bíníyú Téerëe bitih : « Abraham gémpe Koope, te ngémí baa daa tah Koope haba'te ri ɓëyí júɓpé. »[☆] Yii baa daa tah ɗi na dëekúu kooji Koope.

²⁴ Leegi, ɗon olute biti ɓëe' júɓ fíi Koo ra, ɗi ɓëe' teyay gém kep ra, ndaa ɗi ɓëe' na paɗ yin wun ɗa. ²⁵ Ti ɗaaha nen, ɓelii tílèhë hínú Rahap ra, ɓekke i wolu-wolu di ɓëy Israyel faami sompe wa, ñéyíɗté wë waal kay wa heguute.[☆] Yii baa daa tah ɓal Koope haba' ri ɓëyí júɓpé. ²⁶ Faan lahay coonaa raa, ɗeef ɗi húlté. Ti ɗaaha nen, ngémí ñéerëey a pagadɗ wun, ngémí baa lahay njiriñ, saatate.

☆ 2:21 2.21 Saame Dalaana 22.1-19

☆ 2:23 2.23 Saame Dalaana 15.6

☆ 2:25 2.25 Saame Yosuwe 2.1-21

3

Yii lejke búk

¹ Koy-yaayyi yeh, ngënë héní yëeddëh bééɓ. Don yúhúte bití fun fi yëeddëh yí yeh, aattiya'i fun nay luke bi ðëewë bééɓ misik te ay yooɓ. ² Yen bééɓ yen na pagu yii tíkëey waal, a di mín ðii man bééɓ neh a ? 'Bëe' na won yii tíkëh waal faraah ra nék, ðëyi' baa ow kah-kah, te ri mín ham afi iña bééɓ. ³ Yen ðekuu pënís lakaaɓ búk, yen héç ði a daa teem ði bééɓ hatni neɓa' yen ði ñee na neh a ? ⁴ Èlsí bal gaalli gaanna kísí fë, yee yénké bití ngilaaw mi gaante daa na yeñ wa ra ! Añcañ, wa kúruu a duud' yutuud'. Bina-bina waa na bééɓ, ðëe' në kúɗ ðí rë héçé' duuda hatna neɓa' ri ra kep, gaala a daa teem ði bééɓ ñee hatni baaha. ⁵ Ti ðaaha nen, yina' búk ní, míné' won yii gaante ðaaha.

Te ðon yúhúte bití kii wuti yín yín, mín tam luufa bééɓ. ⁶ Búk man kii nen kep ! 'Di non faan, iñi ðossa ðúhë' në ti kii kí kola' safara nen, kaɗ cérrí yen, kaɗ pesi yen bééɓ. ⁷ Ow mín ílíf raɓɓa bééɓ : yee luufa, yakka, fasoh fa, a raɓɓa kísí fë te daa ri yee lah ra, ⁸ ndaa búk ow mínéh ríí ílíf. 'Búk wuneh, na hílséeh, te iña na ðúh në rë na hawa'. ⁹ Yen símuu Yíkëe Boffi yen a búk, yen yujuu ow fa Koope daa sak ði ti di man ði fi Koope nen ra a búk. ¹⁰ Síma yuja' bééɓ ðúhë' búgë yínë. Koy-yaayyi yeh, yii baa waray laha' ðaaha ! ¹¹ Mulii neɓeh a mulii neɓpe na ðúh cula yínë ? ¹² Koy-yaayyi yeh, tal een na lím èlíif è ? Tal béeeñ na lím een a ? Ti ðaaha nen, culi na ðúhíd' mulii neɓeh mínéh ðúhíd' mulii neɓpe.

Yii lejke nufi kola' Koope na

¹³ 'Bëe' haba' afi bití ði ðëyi' ñaañce te neɓpe nuf ðon na ra wa ? 'Bëyi' ñaañce cépíré' afi cépíree pañ iñi wunte,

pes pesi wunte. Don ay teeḅee biti ḁon ñaañute ḁaaha. ¹⁴ Ndaa, yaha biti ḁon ḁëewí pesuu eeñnja' ow, fahiru affi wa kep yin wun raa, ngënë dëmíi biti ḁon ñaañute, te ngënë kée'íi kaaf ka ! ¹⁵ Ñaañadi baa kolaay Koope na, ḁi non iñi ëldúnë, ḁi pagaḁ ow kep te kola' Seytaane na. ¹⁶ Tígí lahte ḁëewí eeñjuu ow, fahiru affi wa kep yin wun ra, tígí daa dara ii naa ñee waal, henay yii hente ḁos. ¹⁷ Ñaañada kola' Koope na ra nék, ladila' keeñ ow ladiloo níi woc, ḁëe' lah jaamma a moroommi, ḁi sos, neḅ woniḁ, ḁi naa'-keeñ níi naa', ḁi líif a pagaḁ wun, ḁi ḁanti génëntélé' ḁëewë, ḁanti hen ḁëyí në poos fíi poos filoon. ¹⁸ Bëewë na sohu jaamma hanndal ki ḁëewë te paguu ri a jaamma ra, jaammaa sohu wa baa ra, pesi júḅpé daa nay naa púlée.

4

Yii lejke iñi ëldúnë

¹ Haa' ya a iñë' yë filiḅ fon haala' yih ? Wa haala' faha'i pesi nebi na woy faannon neh nagajek a ? ² Don na fahuu lah yin ḁon lëhíh yaa, ḁon kée'íih në sah hap ow húl. Don na ḁosu íl yin ow, ḁon míníh rii lah. Hen ḁaa raa nék ḁon iñée, ḁon haa'ee filiḅ fon. Don míníh lah yee fahuu ḁon ḁa, ndah ḁon ḁaguy ri Koope ! ³ Te wuti ḁon ḁaḅ Koope raa sah, ḁon lílíh dara, ndah ḁee na ḁaguu ḁon ḁa etay. Don ḁaguu yii nay neḅle peson kep ! ⁴ Don yégúy Koope ! Don yíih biti ḁëyí pokoh iñi ëldúnë, ḁëyí baa kaa'ohi Koope a ? Kon, yúhí biti ḁëyí fí faha' pokoh iñi ëldúnë, ḁëyí baa hente kaa'ohi Koope. ⁵ Ngënë hébíi biti iña bíníyú Téerëe rë bíníyú pëtíh ee ! Bíníyuté filiḅ Téerëe bitih : « Koope fiira'te yen, fiira'te coonaa fa ḁek ḁi yen ḁa, te faha' biti yen tikún nuffi yen ḁii na kut. » ⁶ Ndaa kaa'eeh biti ḁi onte yen mali mitte

sëk ndée bíníyúté bití ðal : « Koope ñéerëey a bëewë na gaan-gaanluu ra, ði ona' bëewë cépírú affi wa ra mal. »[☆]
⁷ Kon, ñéyí yee faha' Koope ra ! Hée'íi Seytaane, ði ay ron wuloh ! ⁸ Léβíi Koope, ði ay ron leboh ! Don fi bakaaroh ya, bëeñjii bakaadðon ! Don fa lahuu nuf ana ra, hési keeññon ! ⁹ Pésí pes sífúñíð ! Fëgí ðon hawoh ! Yennon yíssëe looy, sosi keeññon yíssëh sífúñ. ¹⁰ Cépírí affon fii Yíkëe, ði ay ron ðéyíð.

Yii lejke heefa'

¹¹ Koy-yaayyi yeh, ngënë wënëntíi ðos sun fon. Bëyí won ðos sun fi moroomi mbée heef ri, ðeef ði won ðosa sun fi kootii Koope te ri heef Kootaa. Bëyí heef Kootaa nék, ðeef ði aattiya' ri aattiyoo, ði ñeyay yee won Kootaa ra. ¹² Koope kut daa yera' Kootaa, Koope kut daa na aattiya', Koope kut daa mín sëmlé' ow, Koope kut daa mín sanjku ow. Don fa na heefu moroommon yaa ra nék, ðon homuu bití daa ron i wah sah ?

Yii lejke gaan-gaanloh

¹³ Leegi nék, síkíríi sè' ðon fa na wonu bití woteh mbée kéy, ðon ay pay gini man nañam, ðon baana-baana dín fë níi hen kíil, ðon lah héliis ðë. ¹⁴ Don yúhú yin kéy fën ë ? Don yíih bití peson man maal nen kep a ? Maal laha' wahtu ðee rek, ði yíppí gét. ¹⁵ Don kay, ðon waðti wonun bití ðon ay pes, ðon pañ yii man nañam, hém neβa' Yíkëe. ¹⁶ Ndaa, tígë homuu ðon bee ra, ðon tasuu gaan-gaanloh gaan-gaanloo a wonni ðemíidðë ðon na, te gaan-gaanloh ti ðaa nen wuneh. ¹⁷ Kon bëyí yúh yii wunte te pageh ri, ðeef ði bakaadte.

[☆] 4:6 4.6 Saame Léeh yë 3.34

5

Saak a yíkëe yí alalla

¹ Leegi nék, ðon fi yíkëe yí alalla síkíríi sè' ! Fëgí, ðon hawoh ndah sífúñ fë nay keene sun fon ða ! ² Alal mon yahte, búuḅḅën maasse, ³ úríssën a tiññi hélfissën homaakke te homaagi baa daa teeḅa' biti ðon homuy kaah te ri ay ron sarjku ti di na muuyla' kí gaawa nen. Don homute ðon na garu alal, te ëldúnë túkkítë níi wocce. ⁴ Don kaa'uute yínlí ðëewë légyírú rën meeyyon ða, te hélsë warun ðon waa yíníl koon ða daa teeḅa' níi lante biti ðon homuy kaah. ðëewë légyírú rën yaa ra fogute, te Koo-Yíkëe Kélfíi gaana kelohte wa. ⁵ Don pesuu caakla' a neḅ feey fi beh, ðon na yefaluu ti júrí suu hawu hawo nen. ⁶ Don daanute ðëewí júḅúté, ðon hawute wa húl te wa hécéntúuy a ðon.

Yii lejke nimili Yíkëe

⁷ Koy-yaayyi yeh, lah híinndíi níi yiin nimili Yíkëe. Don olute ðee na híinndë' línëh sehe iña nay rii lece meeyi ra maan ? Te añcañ, ði ay seh mulaa nay ðéḅée tap Koo feey níi yee nay míllée rë paay, ði anti lec. ⁸ Kon ðon fi yaa ḅal, lah mújí ðon ham híin, nimili Yíkëe wullilay.

⁹ Don fi koy-yaayyi yeh, ngënë cëpítíi hanndal kon toñeh Koope ay ron daane. Aattiyoha aa saañ haale ra aa sah faf ! ¹⁰ Koy-yaayyi yeh, yonente ya na húmú wonu di tii Koo-Yíkëe rë deyute coono ndaa mújúté. Kon, lah mëdí ti wa nen. ¹¹ Don yúhúté biti ðëewë në mújú coono yi wa ra, yen dëekúu wë « sos-keeññi yeh ». Don keltuute ðee mújé' Yop coono fi ra a tígë míllúu ḅani Koo-Yíkëe rë

maan ? 'Don olute dfee naa'a' Koo-Yíkëe keeñ a dfee baaha' ri ra maan* ?

¹² Koy-yaayyi yeh, yee lukki lah solo ra nék daa ri bitih : ngënë ëñí ! Ngënë ëñí ní 'don cap sun-Koo mbée feey fi beh. Yaha biti 'don ay wone « í » rëe, wëní « í » kut 'don teem daaha. Yaha biti 'don ay wone « ëe-ëe' » rëe, wëní « ëe-ëe' » kut 'don teem daaha. Ngënë ëñí añohi mín díí man béeb ! Hen d'aa raa, 'don ii daanu fayuu.

¹³ 'Bëe' hom coono 'don na ra d'aga ! 'Bëe' lah sos-keeñ 'don na ra lab'da Koope kañaa ! ¹⁴ 'Bëe' jér 'don na ra dëekrëe njittí jañaa, wa leef d'i díw di tii Yíkëe, d'agid d'i. ¹⁵ 'Dañi manna' d'ah, ñéerée a ngém rek sëmlée jérdë, Yíkëe cëgíd d'í cot. Yaha biti d'i bakaadte raa, Koo-Yíkëe baal ri. ¹⁶ Kon, wëní bakaad'don hanndal kon, 'don d'agiranta' ndín, 'don wah këlëj. 'Dañi bëyí júbpé hom laha' doole. ¹⁷ Éelí húmú ow ti yen nen ndaa d'aga' ri biti Koo banti tob híinté d'ani ra, mulub taway feey fa ní hente kíil éeyë a caan. ¹⁸ Filoon fi baaha d'i d'anke biti Koo dalaat tob, bacala lasse, gañcaha paalte ní meeyya nonte.

¹⁹ Koy-yaayyi yeh, ow di 'don na hel waali, ow kay habra' ri wëgísíd d'í kaaf ka raa, ²⁰ bëe' wëgísíd d'í kaaf ka baa ra hela nuf biti bëyí habra' bakaaroh wëgísíd d'í waala wun d'aa, d'eeef d'i sëmlé'té rí kúl kë te ri ay tah bakaaroha baalu bakaad' caak.

* ^{5:11} 5.11 Saame Téerí Yop : Yop húmú bëyí caakke alal. Koope yerisse Seytaane na yakka alal mi, happe koyya ní iña laha' ri ra béeb d'úmpé tak, antee tik so'dte ri jéri misikke, faana béeb paasse. Ndaa taheh d'i yeris ngémí, hampe Koope na híin ní míllë' lah sos-keeñ.

Séréel Ndút: Unni Koope

Ndut: Séréel Ndút: Unni Koope (New Testament+)

copyright © 2020 Wycliffe Bible Translators, Inc.

Language: (Ndut)

Contributor: Wycliffe Bible Translators, Inc.

All rights reserved.

2020-11-19

PDF generated using Haiola and XeLaTeX on 14 Jun 2022 from source files dated 13 Jun 2022

a3a1238b-9393-5875-a4c5-1d3f38537bfe